

D.R. 21/2019

RANG UNDANG-UNDANG

b e r n a m a

Suatu Akta untuk meminda Perlembagaan Persekutuan.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Perlembagaan (Pindaan) 2019.

(2) Seksyen 3 Akta ini mula berkuat kuasa pada tarikh yang ditetapkan oleh Yang di-Pertuan Agong melalui pemberitahuan dalam *Warta*.

Pindaan Perkara 47

2. Perlembagaan Persekutuan dipinda dalam Perkara 47, dalam perenggan (*b*), dengan menggantikan perkataan “dua puluh satu tahun” dengan perkataan “lapan belas tahun”.

Pindaan Perkara 119**3. Perkara 119 Perlembagaan Persekutuan dipinda—**

- (a) dalam Fasal (1), dalam perenggan (a), dengan menggantikan perkataan “dua puluh satu tahun” dengan perkataan “lapan belas tahun”; dan
- (b) dalam Fasal (4), dalam perenggan (b), dengan menggantikan perkataan “memohon supaya didaftarkan” dengan perkataan “didaftarkan”.

Pindaan Jadual Kelapan

4. Jadual Kelapan kepada Perlembagaan Persekutuan dipinda dalam seksyen 5 dengan menggantikan perkataan “dua puluh satu tahun” dengan perkataan “lapan belas tahun”.

HURAIAN

Rang Undang-Undang ini bertujuan untuk meminda Perlembagaan Persekutuan.

2. *Fasal 1* Rang Undang-Undang ini memperuntukkan tajuk ringkas Akta yang dicadangkan dan kuasa Yang di-Pertuan Agong untuk menetapkan tarikh permulaan kuat kuasa *fasal 3* Akta yang dicadangkan. *Fasal 2* dan *4* akan mula berkuat kuasa serta-merta pada tarikh berikutan tarikh penyiaran Akta yang dicadangkan dalam *Warta* menurut seksyen 19 Akta Tafsiran 1948 dan 1967 [*Akta 388*].

3. *Fasal 2* Rang Undang-Undang ini bertujuan untuk meminda perenggan (b) Perkara 47 Perlembagaan Persekutuan untuk menurunkan umur seseorang warganegara yang layak untuk menjadi ahli Dewan Rakyat daripada dua puluh satu tahun kepada lapan belas tahun.

4. *Fasal 3* Rang Undang-Undang ini bertujuan untuk meminda Perkara 119 Perlembagaan Persekutuan. *Subfasal 3(a)* bertujuan untuk meminda perenggan (a) Fasal (1) Perkara 119 Perlembagaan Persekutuan untuk menurunkan umur seseorang warganegara yang layak untuk mengundi daripada dua puluh satu tahun kepada lapan belas tahun. Pindaan ini akan membenarkan lebih ramai warganegara Malaysia untuk mengundi.

Pada masa kini, seseorang dikehendaki untuk memohon bagi pendaftaran sebagai seorang pemilih dalam sesuatu bahagian pilihan raya dan tarikh kelayakan dalam perenggan (b) Fasal (4) Perkara 119 Perlembagaan Persekutuan merujuk kepada tarikh permohonan itu. *Subfasal 3(b)* bertujuan untuk meminda takrif

“tarikh kelayakan” dalam perenggan (b) Fasal (4) Perkara 119 untuk memberikannya maksud sebagai tarikh seseorang didaftarkan oleh Suruhanjaya Pilihan Raya sebagai pemilih dalam sesuatu bahagian pilihan raya. Dengan pindaan ini, apabila seseorang warganegara mencapai umur lapan belas tahun dan layak untuk mengundi, dia akan didaftarkan secara automatik sebagai pemilih oleh Suruhanjaya Pilihan Raya.

5. *Fasal 4* Rang Undang-Undang ini bertujuan untuk meminda seksyen 5 Jadual Kelapan kepada Perlembagaan Persekutuan untuk menurunkan umur seseorang warganegara yang layak untuk menjadi ahli Dewan Undangan daripada dua puluh satu tahun kepada lapan belas tahun serupa seperti pindaan yang dicadangkan kepada Perkara 47 dalam *fasal 2*.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3160]